

Friûl di Jevât

PAR CURE DA LA SOCIETÂT FILOLOGJICHE FURLANE

Vie Bellini, 3, Guriza - tel./fax 0481533849 - gorizia@filologicafriulana.it - www.filologicafriulana.it

Il Centenari

Gurize si prepare a celebrâ il centenari di fondazion da la Societât Filologjiche Furlane, stant che e je la citât che ai 23 di Novembar dal 1919 le à viodude a nassi. Tai ultins mês a son stadis proponudis iniziativis par dâ vivôr al grup gurizan e tra lis tantis o ricuardin: une cunvigne su la Declarazion Faidutti-Bugatto a Çarvignan, par cure da la Associazion Culturâl Bisâche; lis presentazions dal libri *Rimis furlanis* di Giovanin Minut par cure di Ferruccio Tassin e dal libri *Oronimi del Friuli* di Barbara Cinausero Hofer e Ermanno Dentesano, cu la colaborazion dal CAI di Gurize; un apontament di leturis par furlan pai plui picinins dentri dal festival da la leterature pe infanzie in lenghe furlane *Fruts!*, promovût dal centri Docuscuele; il ricuardi di Eraldo Sgubin te sale civiche di Cormôns cuntun biel e sintùt incuintri.

Tal 2019 la Societât si prepare a puartâ indevant apontaments e iniziativis par chest an tant impuantant, cu la preseose colaborazion di associazions e ents dal teritorî e cu la volontât soreduòt di rinfuarçâ il leam cu lis scuelis. Un dai prins intindiments al chel di jentrà in Cjase Ascoli, palaç di proprietât dal Comun di Gurize che si cjate tal vecjo ghet ebraic e che al à viodût a nassi tal 1829 il glotolic Graziadio Isaia Ascoli, che la Filologjiche i è intitulade. Un biellissim spazi dulà che a cjataran puest ufcis, une biblioteche, une sale pes cunvignis e une mostre permanent su *Le lingue di Gorizia*. In Otubar, dai 7 ai 9, e vignarà organizade une cunvigne internazional di toponomastiche. E si rivarà cussì al grant incuintri dai 23 di Novembar, cuant che la Societât e incuintrà, a buinore, lis scuelis di Gurize e dopomisdi, tal Auditorium da la Culture Furlane, al vignarà presentât un docufilm su la figure di Ugo Pellis e la grande imprese dal Atlant lenghistic talian, cu la regie di Dorino Minigutti. Ator di cheste zornade al vignarà imbastit anche un calendari di iniziativis in colaborazion cun Terzo Teatro e cun altris associazions locâls.

Apontament par domenie ai 10 di Març cun ancje l'elezion dai orghins sociâi



Domenie ai 10 di Març dal 2019 a lis 9 e mieze di matine, intal Salon d'onôr di Palaç Mantica, sede dal Sodalizi (inte foto), in via Manin 18 a Udin, si da dongje la Assemblee dai Sosci da la Societât Filologjiche Furlane.

Come ogni an si rive a chest apontament par fâ un belanç no dome finanziari, ma ancje da lis atividâts che la Societât e à inmaneât intal an passât e di chêis in program pal an in cors. L'ordin dal di al previòt di fat l'esam e l'aprovazion dal belanç 2018 e dai documents de prevision pal 2019. Chest an si fasaran ancje lis elezionis dai orghins sociâi che a vuideran il Sodalizi pal trieni 2019-2021: Consei Gjenerâl, Consei dai Revisôrs dai conts e Probivîrs.

"O vivin intun moment cetant impuantant, come Societât Filologjiche Furlane - al motive il President Federico Vicario - il moment dal ricognosiment definitif, di bande da la Region autonome, da lis funzions che l'Istitutûl al met in vore, cun cualitât e continuitât, a pro di dute la comunitât. A son funzions che a van definidis in tiermins di sussidiarietât jenfri public e privât, mantignint il spirit e i ideâi che, tal Novembar dal 1919, a sburtavin i Paris fondadôrs dal nestri Sodalizi". L'incuintri si vierzarà cu la relazion morâl dal President, che al presentarà i moments plui impuantants da lis atividâts fatis tal 2018 e intal ultin trieni,

Societât Filologjiche in Assemblee

e al ripuarterà in particolâr lis tantis iniziativis editoriâls, formativis, promozionâls e projetuâls che a àn impegnat il Sodalizi intal compit di spandi la culture, la lenghe e la storia dal Friûl. L'an passât, in particolâr, la Societât Filologjiche e à tignût il Congrès sociâl a Colorêt e la tradizionâl *Fraie de Verte* a Budoie a conclusion da la V edizion da la *Setemane de culture furlane*, la rassegne di iniziativis culturâls che cun 130 events si è slargiade in dut il Friûl e in cualchi comun dal Venit.

Di là dai events, e je simpri impuantante pal Istitutûl la atividât di didatiche e formazion, cui cors pratics di lenghe furlane realizâts cu la poie da l'ARLeF, che si son tignûts in 22 comuns dal Friûl cu la partecipazion di 488 corsiscj. Une vore impuantante e je ancje la atividât da la Biblioteche sociâl, che e à inviat il catalic in linie "Riviste friulane" cun chê di meti in rêt i contribûts in formât digitiâl dai periodics locâi che a scrivin di teritori, storie, ambient, art, lenghe e culture furlane. Cun di plui, in plui da lis

rivistis sociâls (*Ce Fastu?*, *Sot la Nape e Strolic furlan*) tal 2018 la Filologjiche e à publicat 17 monografis gnovis. Par finâ, in gracie da la atividât dal Docuscuele, il Centri al servizi da la scuele regionâl, a son stâts cetanc i apontaments di formazion pai insegnants, di presentazion dai materiâl didatics, di atividâts di laboratori intes scuelis, di promozion da la lenghe furlane pes fameis e pes comunitàs locâls.

La Assemblee si siererà cu la presentazion dal document de prevision pal 2019, un an che al sarà siôr di atividâts ancje stant che al cole il Centenari di fondazion da la Societât Filologjiche, nassude a Gurize ai 23 di Novembar dal 1919. In plui da la *Fraie de Verte* a For disore, che e siererà la gnove edizion da la *Setemane de culture furlane*, dai 9 ai 19 di Mai, chest inovâl cetant impuantant al sarà ricardât cuntune schirie di iniziativis sul teritori, a Udin - li che si fasarà il Congrès sociâl - e juste apont a Gurize, citât di fondazion.

Gnove publicazion

La presentazion par vierzi la "Fieste de Patrie", ai 22 di Març par cure di Franco Finco

Cjarte toponomastiche dal Comun di Gurize

La *Fieste de Patrie* dal Friûl chest an e vignarà celebraðe a Gurize. Mai moment al è plui oportun par celebrâ cheste zornade a Gurize: un moment par fevelâ di autonomiis locâls indulà che la stesse autonomie dal Gurizan e je metude in forsit. La *Fieste* si le fasará domenie ai 7 di Avril e, tal prossim numar di "Friûl di Jevât", o fevelarin di dut il program da la zornade e da lis manifestazions che a insioraran il program.

In spiete di chê zornade, la Societât Filologjiche Furlane e ufris a la citât e al Gurizan un gnûf imprest realizât inte suaze dai projets inmaneâts dal Comun di Gurize cui fonts da la leç 482 dal 1999: la cjarte toponomastiche dal teritori dal Comun di Gurize, che e vignarà presentade ai 22 di Març

bande dal professôr Franco Finco, studiôs di toponomastiche ben cognossût. In cheste cjarte si cjate une schirie di toponims par furlan (gurizan), sloven e ancje la indicazion storiche taliane: un mont che si vierç pe cognossince da la nestre citât. No dome nons di stradis e di placis, ma ancje di bors e localitâts di dut il teritori dal Comun: dai Cai Eremits a misdi fintremai a la mont di Sant Valentin a nord, di Pubrida a soreli a mont a la mont dal Cjascjel a soreli jevât.

Al è duncje un imprest une vore util e interessant par fâ viodi cemût che i toponims storics a son stâts mudâts tal cors dal temp ancje par resons puliticis. E propit chest al è il fat interessant di cheste cjarte: il progjet al è nassût propit

par fâ viodi a ducj i Gurizans di vuê cemût che la citât e je cambiade dilunc dal Nûfcen, e dome cumò - ancje in gracie da lis normativis di tutele la toponomastiche storiche e lenghistiche - la citât e torne a doprà i vecjos nons ancje par furlan e par sloven. Cheste cjarte di fat e je il risultat di un lavor a plui mans: da lis indagjinis su la toponomastiche storiche di Gurize, cu la colaborazion da la Consulte comunâl slovene di Gurize, cul coordenament da la Societât Filologjiche Furlane. E ancje la presentazion di cheste cjarte par vierzi lis manifestazions da la *Fieste de Patrie* e je significative: Gurize, dentri dal Friûl Vignesie Julie, e je une citât diferente indulà che di simpri si son feveladis dutis lis lenghis da la nestre region. E se cheste no je autonomie...

